

Bekalan tomato Cameron Highlands cukup

CAMERON HIGHLANDS- Bekalan tomato yang dikeluarkan di Cameron Highlands mencukupi dan dijual pada harga kawalan ditetapkan.

Ketua Pegawai Penguatkuasa Kementerian Perdagangan Dalam Negeri dan Hal Ehwal Pengguna (KPDNHEP) Pahang, Ahmad Fitri Ali berkata, hasil tinjauan pihaknya mendapati faktor cuaca yang tidak menentu kebelakangan ini tidak mengganggu hasil pengeluaran tomato di kawasan tanah tinggi itu.

Menurutnya, KPDNHEP Pahang turun padang memantau bekalan dan harga tomato di Cameron Highlands kelmarin ekoran desas-desus berlaku kenaikan harga di peringkat ladang di sini.

“Namun hasil pemeriksaan dan semakan rekod daripada peniaga mendapati bekalan dan harganya masih stabil seperti yang ditetapkan dalam Skim Harga Maksimum Musim Perayaan (SHMMP) Tahun Baru Cina 2020,” katanya dalam satu kenyataan semalam.

Ahmad Fitri berkata, sepanjang pelaksanaan SHMMP Tahun Baru Cina sehingga 28 Januari, sebanyak 1,027 premis perniagaan seluruh Pahang diperiksa.

“Sebanyak 34 kes kesalahan dikesan dilakukan peniaga termasuk gagal menggunakan tanda harga merah jambu dengan 33 kes dan satu kes atas kesalahan menjual melebihi harga maksimum,” katanya.



Ahmad Fitri (kiri) meninjau bekalan tomato di premis pembekal di Cameron Highlands kelmarin.